



而立集

俞平伯題



84-8
142-3



3 0526 7067 0

而立集序

詩大序曰詩者志之所之也在心爲志發言爲詩情動於中而形言言之不足故嗟嘆之嗟嘆之不足故永歌之不知手之舞之足之蹈之是詩者所以寓性情而不能已乎言者所謂上以風化下下以風刺上主文而譎諫言云者無罪聞之者足以戒秦漢以上之所作是也洎乎魏晉道降文弊已不免吟風雪弄花月之譏唐宋而後雖代有名家然究其能爲一代靈光者不數數觀也蓋世之耽吟咏者每多馳騁于格調聲病詞華藻飾之間求其能撫取唐宋菁英者亦覺稀貴固不能責其必合於詩教之旨也及門曹明賢生當今日歷滄桑之劫舉凡所見所聞情觸於中輒發吟咏觀其詩肆言頗不失於當率真尙不流乎俗非深得溫柔敦厚之旨者不能此固非過譽也然且較之沾沾乎風雪花月而自喜者亦更勝一籌矣近以所著而立集行將付梓求序於余夫三十而立聖人用以年齡超越自驗所學故爲畧述詩教之旨以期生詩之造詣漸進於從心所欲不踰矩之域也

郝任夫序於津門

而立集敘

自三百篇漢魏唐宋迄今詩人奚止千百數生於今世而欲以一人之力兼擅衆長其勢爲不能抑欲以一人之力而盡埽諸家之習而自標一幟其勢亦爲不能然則如何而可曰自計資才如何天性中有詩而後濟以博學多習庶幾有成天性中無詩雖強爲無當也此所謂能者自能不能者自不能也古今說詩者衆矣最精賅者無如司空表聖廿四詩品廿四品之詩又非一人所能兼工如就性之所近而爲之則不合而自合矣余嘗謂爲詩之道攝其簡要不外三端一曰清晰反之則晦而不解其爲何語一曰有力反之則庭恭浮弱不能動人一曰雅馴反之則儻俗庸陋詩而至於儻俗庸陋不如不作之爲愈也持此三端以求古今能得幾人人能得幾首其高自矜詡盡反古人之道蔑棄一切格律而謂自立宗派者古今誠不乏妄人然徒爲妄人而已因藍而得青因水而得冰者有之若屏絕舊因而能自剏新獲者天下無此事也吾鄉曹君明賢竊從吾遊未冠而工爲韵語新意佳句絡繹而見是天性中有詩者也閱年相遇燕市出示舊稿若干首余遍讀之而嘆其有進也閒嘗與鬯論古今文藝

盛衰消長之故旁及西人韵語與吾中土之異同往復研索所以啓余者實多
余則以頃論三端爲一得之見君意不以爲謬近鈔其而立集求爲叙言余仍
以三端爲勗君之詩允能清麗真摯不乖雅正君年方壯所詣當不可限域夫
春華秋實先時而熟不爲嘉果君其勿汲汲於近名饒而勿舍雖舉世不見知
而不自廢吾則以刮目相待之意屬望吾明賢也甲申中秋書於大梁

河間 郭風惠

而立集

河畔行

河間 曹明賢

河畔柳絲絲絲拂茅屋茅屋住者誰有女守惇獨體態信娉婷貧窶無膏沐
豈曰矜不字自媒良非欲矧乃擇夫君窮年憂無告

春郊小步

睡起無聊甚彳亍步野蹊雨餘花露重風定草烟低到處鶯啼樹誰家燕啄泥
老翁堪入畫獨釣綠楊隄


自省莽自題

井序

幼年居里生計小康不知人間有愁苦事平日更多受陶詩影響故有此作姑載之以存其真
生無媚世姿而有罵世口羞學步邯鄲博虎笑馮婦朱門縱高華何如白屋久
富貴嘆浮雲白衣忽蒼狗夫夫歸田園夷白恬拙守不如意事多恒十居八九
知足天地寬伎求萬惡蔽拋却軒冕榮天職力耕耦東作慶西成有如釋重負
草屋十餘間隘小真如斗兩屋藏縑緇兼以蒞詩友顏曰自省莽立身期篤厚

而立集

一



淖沱水一灣瀟瀟繞其右堂無晉公槐門多靖節柳園圃樊舍西菰韭植半畝
綠縹復葦蕤生機出吾手絕似郭林宗冒雨常剪韭庭前僅容花掃除日擁帚
嘯傲東軒前自勞酌斗酒反朴葆天真無功亦無咎萬事渺秋毫此樂真不朽
寄語夸毗夫蠅營何狗苟鷦鷯巢一枝紅顏旋老醜

村邊小立

朝暾初上暖如烘小鳥緜蠻止樹叢村外數羣挑菜女街頭一個賣花翁雨絲
風片皆春信柳眼桃顚盡化工畢竟田家風味好蝸居底事日書空

過故人墓

二月念三春過半花鬚柳眼各璀璨雙柑斗酒正相宜安步當車無羈絆楊花
遍地滾滾來漁舟晚唱淖沱岸淖沱東岸有妻墳白楊瑟瑟愁煞人乍來不盡
滄桑感青衫淚濕披荆榛黃土壟中卿命薄前塵回首眞如昨憶昔當年心尙
孩伉儷難偕時肆虐數載歸來無別睹風吹草底一抔土可憐婷婷綽約姿血
淚啼乾同杜宇憐卿自幼失怙恃憐我窮途如季子依然潦倒舊青氈五載韶
華驚逝水

擬投考軍官學校感賦二律

廿二韵華嘆逝川斯民塗炭豈前緣乘風破浪懷元幹代父從征愧木蘭鐵甲
金戈看遍地腥風血雨久彌天從今忍別椿萱去不淨妖氛誓不還
不淨妖氛誓不還何須生入玉門關捐軀我羨鱗諸劍助國誰輸卜式錢投筆
從戎班定遠裹屍還葬馬文淵當從劍影刀光裏覓得新詩萬口傳

西村行

男愁娶女愁嫁男女兩愁不相下天成佳偶有幾人莫怪比來結婚近歐化在
河之潞有兩村女織男耕樂最真西村有女顏如玉不習女紅偏好讀東村有
子生更奇詩在童年即絕俗因親負笈向西村與女同學頗和睦斯時兩小無
猜嫌風花雪月咏年年酬唱頗有驚人句人皆鈔去作奇傳瞬息裘葛幾度更
伯勞春燕各西東那知藕斷復絲連經歲薜箋數十通阿父聞之乃大怒痛叱
阿女焚尺素何物田舍翁劃策竟借箸欣然自薦作冰人竟字南村一屠戶巧
語還說締良緣誰知大錯從此鑄合卺期不遠女掛堂前樹可憐蘭質蕙心咏
絮才慘被萬惡禮教誤阿娘怨阿父阿父淚如雨至今西岸一抔土縣縣此恨

成千古

築室既成

柴門臨曲岸景物異般般沙鳥時飛落風帆自往還小橋橫屋後古木拂簷端
更有詩千卷常疑畫裏看

訪 友

人生快意寧有此袖藏詩稿訪知已芒鞋布衣逕出門路草萋萋二三里
繞屋柳低垂輕叩柴扉立曙曦故友欣然迎倒履笑將綠螳斟滿卮談詩樂似
歌大風唾壺擊碎興未終且把浮雲看富貴食足饕飮不算窮賒酒留十日感
極淚沾臆拈韻共吟謳洋洋百憂失君不見李白斗酒詩百篇風流瀟灑稱詩
仙又不見杜老讀書破萬卷詩名千載令人羨

東趙濬川先生

風裡光庭一月春佳章揆藻歎超倫厭餘子美差堪擬賸馥殘膏勾後人
瞻韓恨晚憶瀛城雅度翩翩分外驚安得壺公符縮地鄭郊日日可班荆
河干晚步志感

如駛駒光去不留一番風雨又成秋怨他草露圓如淚恨爾炊烟素似愁遍野
哀鴻誰顧慮中原逐鹿各營謀來遊不盡前塵感華夏沉疴幾日瘳

留別白水

城外新晴景色幽蟬聲嘒嘒墨雲收郇厨飽飫忽多日跋語明知等贅疣
君著儒林逸史丐益爲序雨急一窗涼枕簟宵深三益共衾綢小橋依舊來時路祇有
人添一縷愁

秋日書感

墨守寒窗已十年一番回首一愴然心如籠內思飛鳥身似湖濱久繫船澤國
蘆疏初見蟹霜林葉脫不聞蟬秋聲秋色秋風裡鎮日詩狂欲上天

題獅蟲集腋詩集

狡狴久溺黑甜鄉蜩縮於今百獸忘願藉蟲蟲驚彼夢醒來一吼窺豺狼
四面悲涼唱楚歌會看荆棘沒銅駝九州上下交爭利誰枕劉琨待旦戈
長蛇封豕幾時休賸水殘山滿眼愁莫怪仲淹憂後樂覆巢誰見卵能留
赤馬紅羊念五春毀家紓難是何人列強爭問中原鼎縱有桃園怎避秦

達官誰顧破山河金屋藏嬌樂事多
民脂釀成乾醉酒淺斟低唱舞娑娑
強鄰捷奏凱旋歌得壠由來望蜀多
恨煞同胞四萬萬寧無一個是荆軻

哭王熙臣先生

撒手騎鯨去繳生淚未乾瀛州明月暗
淖水白雲寒交友忘年易知音似子難
獅罍詩集內載有先生及余作品付剗淒絕不曾看

流年眞似水容易又重陽瑟瑟蘆花白
蕭蕭木葉黃今朝聞噩耗客歲憶稱觴
縹渺蓉城路西風正斷腸

相如常臥病靖節久歸田下筆千秋業
哦詩萬口傳聲華君藉甚潦倒我依然
五載他山石東西隔一川

汪洋如雅量享壽未期頤偏我離家日
當君易簣時幽窗無墨客跨竈有佳兒
安得招魂處教宋玉悲

登河間東南城角口占

禾稼登場衰草存西風蛩語送黃昏
農村歷歷差堪數一處炊烟一處村

遲白水不至

登盡莊邊百尺台。天寒地凍獨徘徊。柴門臨水沽魚易。雅客能詩買酒陪。岸柳重遮千里目。斜陽添得萬分哀。癡狂自笑黃昏候。尙聽先生剝啄來。

贈張秉衡先生

吾愛張夫子。蜚聲翰墨場。詩篇多灑脫。器宇自軒昂。去國頭猶黑。歸田鬢已蒼。締交相恨晚。步履過從忙。

對雪

繽紛瑞雪撲重簷。繪繡無溫歲暮天。艷似梨花潔似玉。狂於柳絮白於棉。沙融紫陌鴻留爪。雲鎖疏林雀啄烟。白戰無朋添雅興。自將俚語寫窗前。

乞丐行

一夜風雪急。侵晨猶紛然。憑窗極目望山河。改舊觀。富者圍爐坐一室。別有天。騷人動吟興。新詩錦囊添。最是乞丐苦。既飢且復寒。鶉衣一何薄。決踵絕纓冠。手顛難曳杖。堅冰結髭髯。蹣跚出廢寺。傍午未晨餐。入門呼爺伯。惡犬吠獐然。千家不一飽。焉得漂母憐。或有問庚子。自云古稀年。生活賴行乞。而今步履難。老衰復病廢。凍餒死當前。言之貌甚戚。痛淚墮漣漣。余聞重嘆息。搔首問青天。

秋燕

花正芬芳草正肥朝朝愛傍畫簾飛西風蕭瑟無情甚不是西風不忍歸

戀枕

唱盡鷄聲未起床半床鱗次列縑緇濃雲一夜風吹散又見朝曦上紙窗

病痊以詩謝劉學琴先生

帶減腰圍祇自憐疏狂依舊一張顛清風朗月思玄度讓水廉泉慕柏年起我
沈疴眞國手感君佳句惠濤箋相逢情致纏綿甚翰墨居然竟有緣

之獻邑從軍曉行賦此

鳳泊鸞飄萬里遙遠遊何處不魂銷曉風拂面辭茅店殘月隨人過板橋嘔出
心肝懷李賀拋開筆墨慕班超河山信美爲魚肉不斬樓蘭恨怎消

河平道中二十八年三月十三日

故鄉春色正欣欣柳眼花鬚大可不是干戈不忍別干戈擾攘尙逡巡
煙村乙乙逝如飛熙壤津門衆綠圍返岫閒雲今復出浪花風絮幾時歸

幻想

安得三尺劍飛馬斬強夷凱旋清內亂永建太平基貪污與土劣一起殺盡之
民比無懷氏長幼咸孝慈或居河之澣或住山之隈相見輒然笑相聞有犬鷄
賣刀復賣劍采蕨或采薇夜真不閉戶路亦不拾遺四時花灼爛萬戶柳低垂
桑長無附枝麥秀每雙岐老亦不號寒少亦不啼飢水繞山環處吾覓片土棲
茆屋小而雅四面樊疏籬吾固耽佳句妻亦解吟詩言語妙天下其樂不可支
有如梁與孟堇茶甜如飴伊無女紅累吾無職役羈花前肩每并月下步同移
女友皆道蘊男朋盡子期詩成任傳遞不怕衆人嗤春秋逢佳日一雨萬物滋
偕妻一遠足安用携小婢緩步隨曲徑微風襲人衣輕揚蕩畫舫持竿坐釣磯
峯回路自轉草異花更奇佳景收吟篋徙倚輒忘歸一年周復始樂此不知疲
情人成眷屬終老不相離融融還洩洩皞皞復熙熙

景山懷古

思宗殉國留陳跡屹屹豐碑立夕暉大好景山依舊在可憐人事已全非

旅夜不寐

絃管淒涼不可聽匡床蕩席夢難成家資傾蕩風搖樹骨肉流離雨打萍題柱

相如仍潦倒賦詩子美太飄零承歡菽水知何日陟屺傷心祇淚傾
黯然流落在天涯破浪無時祇自嗟窗上月扶花影動枕邊風送市聲譁飄零
病體輕於燕冷暖人情薄似紗悒悒憂思眠不得何當歸去蒔胡麻

懷舊

蕙質蘭心綽約姿明眸皓齒妝入時咏絮才兼環燕貌非關情眼出西施羅敷
願嫁我欲娶旋乃烽烟離故里離情別緒兩心知兩枝不得成連理月下花前
憶往年悄無人處比雙肩風姨睡去無恐怖共話紅樓到夜闌意網纏綿愛已
深多情憐我苦吟身不圖躑躅無聊日知已居然得玉人疾雨狂風好夢驚一
成泥絮一飄萍長安街上人如鰈曾無一個及卿卿男子一心自古無聚時約
密別時疏我道卿言未必是別來靡刻不啼噓嗚呼我與卿卿命何苦詩人潦
倒正如美人之遲暮十分消瘦沈郎腰又被相思瘦無數昨夜夢卿乃大喜情
話喁喁不能止飄然北海蕩扁舟醒來依舊匡床裏從此輾轉不能眠萬籟無
聲月在天癡心爲定來生約默祝曦和快著鞭

呈郭麾霆夫子

拜違山斗太息息八載韶光一夢中
曩列門牆沾化雨今從京國仰宗風
靈臺似竹猶虛直丰采如霞仍醉紅
回憶垂青愧期許奮飛無力尙途窮
造物於公若獨私文名秀發九州知
仲宣慨賦依劉日工部狂吟入蜀時
畫有千义儕道子書無一字亞羲之
紀公歿後吾鄉士如此才華更阿誰

呈孫蓮舟先生

風流瀟灑羨高名邂逅金台幸識荆
爲避干戈思息影翻嫌文苑久蜚聲
兒孫繞膝爭梨棗花月盈庭恕市城
除了吟哦無箇事行藏如此勝公卿

什剎海即事

風和日麗草如茵荷葉田田出水新
更有一般堪戀處毵毵楊柳拂行人
花香草色正葳蕤一片琉璃衆綠圍
底事杜鵑啼不住哀哀勸客不如歸

贈仙舟

讀君詩未謀君面彈指流光已五年
今日相逢疑是夢縱然是夢也前緣
贈王青芳

景仰先生木刻名藉然文苑久蜚聲
不圖侏僂艱難日得識荊州古北平

工詩善畫迴難侔慷慨相憐感不休長髮布衣飄逸態是真名士自風流

中秋書懷八律

避秦成久客佳節倍淒涼燕去蘆花白鴻來桂子黃雨餘蛩泣露風定葉敲窗
寂寞蕭條裏萼鱸憶故鄉

長安居不易生計使人愁瘦骨輕於燕債台蠹若丘綈袍誰見贈枵腹日吟謳
身世坎坷甚無聊欲問秋

端居無客至盡日枕書眠街上狂飛蓋人家醉綺筵也思歌舞地愧乏杖頭錢
戎馬家山遠鄉心逐雁還

中秋都市夜熙攘幾時停人比江中鰣燈侔天上星管絃傳妙曲糕果遞清馨
不復出門去獨看月轉庭

秋風到古城萬里未休兵骨肉皆分散親朋半死生鶯花離故國橐筆走燕京
依舊吹簫客天涯涕淚傾

彈指又清秋園圓月色幽萬家齊仰首一客獨低頭庾亮登樓樂袁宏泛渚遊
畫簾懷舊句爭那別離愁

步蹠長廊下庭柯落葉飛蟲鳴因露冷月白故星稀潦倒詩魔擾飄零酒興違
西風偏颯颯不管客無衣
迂疏生亂世懷刺總難投豈有飛鳴志能無飽暖謀風霜侵短鬢桎梏不禁秋
佗僚逢搖落揮毫寫四愁

典衣

征衣欲典愁秋暮不典征衣腹內饑幾度思家倍惆悵彌天烽火不能歸

暮秋登暢觀樓

暢觀樓上立四望不分明衰草連荒野寒烟幕古城疏林方落日破寺見歸僧
故里猶烽火愴然涕欲傾

天津客次夜不能寐口占

中宵不寐思悵悵客子魂銷逆旅中樹影橫窗天有月犬聲入耳夜無風破衾
乍覆寒如鉄僵膝頻彎臥似弓四載駒光堪一笑無端踪跡等飄蓬

雪夜懷友

浙澌初疑雨開門雪弄姿風驕爐更滅屋冷足先知有鼠行書案無人共酒厄

青燈照四壁知子正裁詩

辛巳除夕與在田表兄作

異鄉除夕夜觸緒總生愁爆竹迎新歲烽烟鎖故丘何年歸倦鳥盡日賦登樓
漫灑飄零淚酴酥共勸酬

盧龍道中

撲盡吟鞭句未成叱牛聲動故鄉情鶯梭燕剪織春野烟水雲山繞古城飄泊
伊誰憐斷梗嶙峋傲骨誤生平多情最是長堤柳輕折蠻腰送我行

田婦

五月榴花似火燐盈盈粉汗正當軒炊忙那顧兒吃乳米少常憂客到門深苦
夜窗猶紡織不堪午鱣向田園田家豈乏傾城貌雨鬢風鬟何足論

題中大同學孔君畢業紀念冊并序

孔君慶鑒聖門後裔學於中國大學與余同系稱昵交焉

多藝多才勝所聞名門後裔果超群四年師友咸相器從此雄飛定入雲

中秋感言

離亂一家欲見難思親遊子淚頻彈舉頭惟看天邊月可與吾鄉一樣圓
夢見亡妻

明眸玉面入時妝久別重逢喜欲狂堪笑夢中還怕夢果然是夢願延長

秋日遊北海

北海重遊景物非殘荷半倚釣魚磯黃花淡豔開籬落紅葉飄零打客衣萬里
晴空橫旅雁一城簫管送斜暉哦詩忘却西風緊獨立蒼茫未肯歸

聞國軍大捷喜而賦此

八載紅羊劫斯民喚奈何一家團聚少萬里別離多閭巷成焦土田園但藜莎
蚩尤終授首舉國盡謳歌

送劉君之東北

光風寒月羨鴻儀一見居然似故知久仰龍門空引領乍親麀席共論詩初成
大廈爲君賀輾轉夤緣使我悲惆悵明朝又離別河橋折斷柳絲絲

感時

殺人盈野復盈城虎口餘生水一泓遍地干戈懷故里彌天烽火歎蒼生離離

原草看都盡瑟瑟秋風喚尙腥書劍未成逢世亂虬居幾度淚縱橫

呈王嶧山夫子

鶴髮童顏腹自便等身譯述冠幽燕丰神灑落陶元亮詩格鏗鏘李謫仙一事無成慙故我三生有幸出高賢何能久沐春風裏獎掖殷殷不計年先生時任中國大學研究院史學部教授

遊頤和園題小照

萬頃秋波萬樹烟崇樓傑閣門華妍昆明湖上風光好惹得詩狂暮未還

題秉琴女士紀念冊


春明文苑久蜚聲乍聽高談意更驚三月鷄窗悲石火虔將錦繡祝前程

春柳

也拂茅簷也拂樓縹風纖雨碧絲抽腰肢乍擺嬌無力眉黛新描顰鎖愁彭澤門前多娉娜靈和殿裏憶風流干卿底事牽離恨少婦樓頭悔不休


春草

氣轉鴻鈞華質溫芊芊碧草滿郊原祇因省識東風面纔得重遮野火痕夢裏西塘欣得句客中南浦最銷魂亂苗深惑天公意也使同霑雨露恩



民國三十六年四月印

中華書局出版
中華民國三十六年四月五日



著者 曹明賢

代刊者

印刷者

振昶印刷廠	徐士麟	文致中	鄭淑敏	宋福禎	李蓮如	王仲清	陳俊傑	楊照瑞	曹明賢
		葛世廉	楊繼	郭正己	孫春華	李士清	軒鑄卿	董賢隆	

8
12.3